

*MASTER
NEGATIVE
NO. 92-80467-15*

MICROFILMED 1992

COLUMBIA UNIVERSITY LIBRARIES/NEW YORK

as part of the
"Foundations of Western Civilization Preservation Project"

Funded by the
NATIONAL ENDOWMENT FOR THE HUMANITIES

Reproductions may not be made without permission from
Columbia University Library

COPYRIGHT STATEMENT

The copyright law of the United States -- Title 17, United States Code -- concerns the making of photocopies or other reproductions of copyrighted material...

Columbia University Library reserves the right to refuse to accept a copy order if, in its judgement, fulfillment of the order would involve violation of the copyright law.

AUTHOR:

ADRIAN, GERHARD

TITLE:

QUAESTIONES
STATIANAE

PLACE:

[GOTTINGAE]

DATE:

1893

Master Negative #

92-80467-15

COLUMBIA UNIVERSITY LIBRARIES
PRESERVATION DEPARTMENT

BIBLIOGRAPHIC MICROFORM TARGET

Original Material as Filmed - Existing Bibliographic Record

87St2
DZ61

Adrian, Gerhard, 1868-

Quaestiones Statianae; dissertatio inauguralis
quam... scripsit Gerhardus Adrian... [Gottingae]
Typis Hoferianis, 1893.

42 p. 21 $\frac{1}{2}$ cm.

Thesis, Würzburg.

VOLUME OF PAMPHLETS

Restrictions on Use:

TECHNICAL MICROFORM DATA

FILM SIZE: 35 mm

REDUCTION RATIO: 11x

IMAGE PLACEMENT: IA (IIA) IB IIB

DATE FILMED: 2-28-92

INITIALS m. d. c.

FILMED BY: RESEARCH PUBLICATIONS, INC WOODBRIDGE, CT





AIIM


Association for Information and Image Management

1100 Wayne Avenue, Suite 1100
Silver Spring, Maryland 20910



301/587-8202




Centimeter



Inches



MANUFACTURED TO AIIM STANDARDS
BY APPLIED IMAGE, INC.



145 87st2 No. 4
II 76

QUAESTIONES STATIANAE.

Dissertatio inauguralis

quam

ad summos in philosophia honores

ab

amplissimo philosophorum ordine

Regiae Academiae Juliae Maximilianae

Wien

rite capessendos

scripsit

Gerhardus Adrian

Elbingensis.

Wien

Typis Hoferianis.
MDCCCXIII.

Memoriae
sororis meae carissimae
sacrum.

Priusquam ad P. Papini Stati carmina ipse accedam, paucis opus est eos homines doctos, quos quidem noverim, commemorare, qui de huius poetae verbis restituendis bene meruerunt. Veteres nempe illae Stati operum editiones Tiliobrogae, Crucei, Gronovi, Barthi, Marklandi, Duebneri omnibus nimirum satis notae sunt. Sed post Quecki editionem Lipsiae 1854 emissam usque ad hunc annum tantum studii atque laboris in Stati carminibus explicandis collocatum est, ut is qui nunc ad ea accedat nisi maximo labore omnes illas hominum doctorum sententias plerumque diversas penitus perlustrare nequeat. Putares igitur Stati carmina nunc ut quae purissima maximeque correcta a nobis legi. At quantum quidem ad Silvas attinet, e contrario res se habet. Tantopere fata adversus illas saevierunt. Oportuit tamen Baehrensium in tanta Silvarum deformitate emendatiores illas nobis reddere, quam editione sua Lipsiae apud Teubnerum 1876 emissa fecit, praesertim cum ante illum Imhofius (*De Silv. Stat. condicione critica*, Progr. d. latein. Hauptschule in Halle 1859 et *Emend. Statian.*, ib. 1867) monuisset, ne quis in Stati carminibus interpretandis nimis coniecturis studeret et cum alii homines docti, ut Otto Mueller (*Quaest. Stat.*, Berlin 1861), E. Grosse (*Observ. in Stati Silvis spec.*, Berlin 1861), E. Nauke (*Observ. crit. et gram. in Statium*, Breslau 1863) ad Statium a grammaticorum et metricorum doctrina recte intellegendum plurima contulissent. Sic autem hominibus doctis multum ille laboris reliquit. Nec vero deerant, qui Statio emendando studerent, e quibus

quorum legi opuscula afferam: H. Koestlin (Philol. vol. XXXV (1876) p. 493—533; XXXVI (1877) p. 176—181; XXXVII (1877) p. 276—292), L. Grasberger (Fleckeisens Jahrb. f. klass. Phil. CXV (1877), p. 419—425 et p. 769—776, J. J. Cornelissen (Mnemos. V, p. 277—294), L. Polster (Quaest. Stat. part. 1, Gymn.-Progr. v. Wongrowitz, Leipzig (Teubner) 1878), R. Bitschowsky (Zeitschr. f. d. österr. Gymn., 29. Jahrg. (1878) p. 907—912). Multum Stati Silvis recte explicandis ii quoque viri profuerunt, qui singula carmina interpretanda sibi proponerent, ut Herzog (Stati Epithal., Dissert. inaug. Heidelb. 1881), Stange (Stati carm. quae ad Domitianum spectant interpretatio, Progr. d. Vitzthumschen Gymn., Dresden 1887), C. Wachsmuth (Rhein. Mus. 43, p. 21—28).

E quibus maxime Wachsmuthi verba penitus animo meo mandavi (l. l. p. 21):

„Das Verständniss der Gelegenheitsgedichte, welche Statius in seinen Silven zusammengestellt hat, zu eröffnen, bedarf es vor allen Dingen einer erklärenden Ausgabe. Eine solche müsste es sich einerseits angelegen sein lassen, die damaligen Zustände, Sitten und Verhältnisse des Lebens der Stadt Rom und insbesondere der römischen Grossen klar zu legen, wo immer Statius auf sie anspielt; wie sie andererseits eine eingehende Darlegung des eigenthümlichen Apparats von Worten, Ausdrücken, Bildern, mythologischer Vorstellungen geben müsste, mit denen Statius arbeitet. Erst so wird eine Würdigung der in der That in vieler Beziehung lehrreichen Kultur- und Sittenbilder der damaligen römischen Gesellschaft möglich sein“.

neque quidquam magis desidero, quam ut ego aliquando tali commentario instructa Stati carmina edere possim, etsi quot quantaque difficultates usque ad eum finem mihi superandae sint, minime me fugit. Sperari tamen certe potest, nisi mihi obtigerit, alium aliquem tali

modo Stati carmina editurum esse, quoniam ipsis ultimis nostrae aetatis annis a nonnullis hominibus doctis ad ea intellegenda permulta collata sunt. Plurimum enim puto hac in re profecisse Eduardum Schwarz (Coniectanea, Ind. lect. Rostock, 1889) et post illum Fridericum Leo (De Stati Silvis commentatio, Ind. schol. Gotting. 1892.) Omnino autem optandum est, ut is, qui Stati Silvas denuo edat, ante omnia multas illas doctorum quorundam hominum coniecturas vel supervacuas vel manifesto falsas omittat, quamquam in Stati libris persaepe difficilior est ea, quae tradita sunt, verba recte intellegere, quam coniecturis delere. E quibus locis paucos nunc mihi liceat proferre.

Primum enim Silv. I, 1, 18*) Baehrensium non recte fecisse puto, quod codicum scripturam non servaverit:

exhaustis Martem non altius armis

Bistonius portat sonipes magnoque superbit

Pondere,

ubi apud Baehrensium legitur:

ex vastis Martem non altius armis.

Nam si quis meminerit iam Vergilium hac voce exhauriendi similem in modum usum esse neque apud Statium eiusque aequales simillima exempla deesse, huic coniecturae non poterit assentiri. Liceat igitur mihi nonnullos locos, qui comparentur, afferre:

Verg. Aen. IV, 14: heu, quibus ille

Jactatus fatis! quae bella exhausta canebat!

ib. X, 57: quid pestem evadere belli

Juvit et Argolicos medium fugisse per ignis

Totque maris vastaeque exhausta pericula terrae,

Dum Latium Teucrici recidivaque Pergama quaerunt?

Stat. Silv. III, 5, 40:

Scilicet exhausti Lachesis mihi tempora fati

Te tantum miserata dedit.

*) In afferendis Stati carminibus Silvarum utor editione Baehrensi Lipsiae apud Teubnerum 1876, Achill. et Theb. Kohlmanni editione ib. 1879 emissa.

Theb. VI, 215: instant flammis multoque soporant
Imbre rogam, posito donec cum sole labores
Exhausti;

Theb. VIII, 216:

Iam fessis gemitu paulatim et corda levavit
Exhaustus sermone dolor

Theb. X, 36: iuvat exhaustos iterare labores.

ib. 383: Eunt taciti per maesta silentia magnis
Passibus exhaustasque dolent pallere tenebras.

Sil. Pun. VI, 656: belli patribus monumenta prioris
Exhausti.

His igitur e locis videtur mihi apparere Silv. I, 1, 18
nihil mutandum esse, sed *exhaustis armis* idem significare
atque apud pedestris sermonis scriptores *bello finito*.

Iam accedamus ad Silv. I, 2, 60, ubi secundum
codices manuscriptos Statius de Venere dicit:

Fessa iacet stratis, ubi quondam conscia culpae

Lemnia deprenso repserunt vincula lecto,
cum Baehrensium Jacobsi coniecturam receperit, qua
moecho legitur pro *lecto*. Sed illa notio, quam Jacobsius
videtur desiderasse, notissima in hac fabula satis
exprimitur eis verbis, quae sunt *conscia culpae* et *deprenso*.
Praeterea non solus moechus depensus erat, sed ipsa
Venus — id quod multo maiore pudore atque ignominia
illam affecerat — ab omnibus dis cum Marte in lecto
accubans conspecta erat. Maxime autem ut codicum
scripturam veram esse putem, ea re adducor, quod
comparandos habemus Stati versus Theb. VII, 62, 63:

talem divina Mulciber arte

Ediderat; nondum radiis monstratus adulter

Foeda catenato luerat conubia lecto.

Nam ut hic *catenato lecto*, legimus illic *deprenso lecto*,
neque facile quidquam similis inter se esse posse puto.

Ac ne Silv. I, 2, 103 quidem a quadam violentia,
ut ita dicam, mihi videtur Baehrensium cavisse. Nam
etsi hoc loco de codicum scriptura dissentire licet, equidem
tamen veri simillimum putem in archetypo fuisse:

Finis erat; tenera matris cervice pependit

Blandus et admotis tepefecit pectora pennis.

Id autem, quod apud Baehrensium legitur:

Dixerat et tenera matris cervice pependit

e codicum scriptura nullo modo probabile videtur
minimeque habemus, quod hic de ea decedamus, cum
Vergilius quoque Aen. I, 223, postquam Aeneam socios
consolantem fecit, dicat:

Et iam finis erat

et cum apud Statium quoque saepius haec verba
inveniantur, velut Theb. VI, 212:

Finis erat, lassusque putres iam Mulciber ibat

In cineres

et Theb. VI, 343:

Finis erat, differt avidas audire sorores.

Deinde miror, cur Baehrensium Silv. I, 2, 202:

Macte toris, Latios inter placidissime vates,

Quod durum permensus iter coeptique laboris

Prendisti portus.

codicum scripturam non servaverit, magis vero miror,
quod Herzogius (l. l. p. 21) hunc locum non intellexit.
Is enim in eo maxime offendit, quod illae voces, quae
sunt *permensus* et *prendisti*, particula *que* coniunctae
sunt. Hoc vero mirari in Stati libris minime licet.
Innumeri enim fere in huius poetae carminibus exstant
loci, quibus ut apud alia verba, sic praecipue apud
ea, quae deponentia grammatici vocare solent, verbum
esse omittitur, cuius rei exempla afferam haec: Silv.
II, 1, 90:

Nec senior Peleus natum comitatus in arma

Troica, sed claro Phoenix haerebat alumno.

Silv. II, 1, 127:

Iam tamen et validi gressus mensuraque maior

Cultibus et visae puero decrescere vestes.

praeterea Silv. II, 4, 29, 30; III, 5, 30, 32, 47; IV,
1, 33; IV, 6, 85; V, 1, 46; V, 2, 36; Ach. I, 127,
143; II, 19; Theb. II, 451, 550, 657, 686; III, 238, 324:

Iamque remensus iter fesso Danaeia Tydeus
Arva gradu viridisque legit devexa Prosymnae
Terribilis visu.

Theb. III, 496:

Sic fatus et alto

Membra locat scopulo; Theb. III, 601; IV, 311,
552, 644; V, 303, 473; VI, 735; VIII, 504, 526; X,
795, permultis aliis locis. Quam ob rem equidem
hunc, de quo agimus, locum non solum rectissime
puto traditum, sed etiam facillimum esse ad intel-
legendum.

Iam a Marklando immerito, ut mihi quidem videtur,
mutatus est locus, qui exstat Silv. I, 2, 231:

Fronde virent postes et fulgent compita flammis
cum apud Baehrensium legamus:

Fronte virent postes, efulgent compita flammis.

In quibus *fronte* quidem mendum typographicum esse
crediderim, cum reliquae Stati editiones, quas quidem
noverim, omnes *fronde* exhibeant. Marklandi autem
coniectura, qua scribitur *effulgent* pro *et fulgent* vel
Baehrensi *ecfulgent* parum, quo nitatur, habet, quam
ut eam accipere possimus. Nam ut hic taedis compita
fulgere dicit Statius, sic sinmillime apud eundem
poetam legitur Silv. II, 4, 10:

At tibi quanta domus rutila testudine fulgens
et Theb. III, 709: saevoque genas fulgebitis auro.

Nec minus nulla mutatione egent illi versus Silv.
I, 5, 63, 64:

Ingenio curaue, puer!

macte, oro, nitenti

Nam saepissime Statius in eiusmodi sentiis, qualem
hic habemus, vocem *oro* addit, ut:

Silv. III, 4, 103:

eat, oro, perannos

Iliacos Pyliosque simul.

Silv. IV, 8, 23:

sic fertilis, oro,

Stet domus et donis nunquam nudata sacratis!

Theb. XI, 717:

sed tu maioribus, oro,

Imperii potiare bonis.

Quam ob rem errasse mihi videtur Baehrensium, cum
scriberet: macte ore nitenti

Ingenii curaue puer!

et huc accedit, ut secundum sermonem Statianum
ingenii ad *curaue* pertinere non possit. Semper enim
hic poeta particulam *que* primo novae sententiae verbo
affigit, cuius rei exempla in qualibet Stati librorum
pagina satis multa inveniuntur. Itaque hoc solum
carmen Silv. I, 5 perlustrare mihi liceat:

v. 6: Naidas, undarum dominas, regemque corusci

Ignis adhuc fessum Siculaque incude rubentem

Elicuisse satis.

v. 11: Cunctantemque intende chelyn.

v. 12: dum nitidis canimus gemmantia saxis

Balnea dumque procax vittis hederisque soluta

Fronte verecundo Clio mea ludit Etrusco.

v. 15: Ite deae virides, liquidosque advertite vultus.

v. 23: quae Latium septenaue culmina, Nymphae,
Incolitis Thybrimque novis attollitis undis.

v. 32: ipsa manus tenuit Cytherea mariti

Monstravitque artes.

v. 35: Maeret onyx longe queriturque exclusus ophites.

v. 48: sed argento felix propellitur unda

Argentoque cadit labrisque nitentibus instat.

v. 53: Cui non ire lacu pigrosque exsolvere amictus
Suadeat?

His autem exemplis addam tum etiam hunc usum
Statii servare, si prima novae sententiae vox
praepositio est, velut Silv. I, 4, 10:

Ergo alacres, quae signa colunt urbana, cohortes,
Inque sinum quae saepe tuum fora turbida questu
Confugiunt.

Itaque hanc quoque ob causam Baehrensi coniectura
minime probabilis videtur.

Transego ad alium locum, Silv. I, 6, 44, ubi tradita
illa verba:

Una vescimur omnis ordo mensa
Parvi, femina, plebs, eques, senatus
mira coniectura Baehrensium sic mutavit:

Mas et femina, plebs, eques, senatus,
nimirum quia nesciebat saepissime Statium *parvum*
dicere pro *puero*. Sed recte tradita esse haec verba
iam ante me complures homines docti contenderunt, ut
Stange (l. l. p. 34). Nunc autem id, quod ille recte
sensit, certis documentis possum demonstrare. Simillime
enim dicit Statius Theb. VII, 520:

Ad vestrum gemitus nunc verto pudorem,
Inachidae, liquistis enim parvosque senesque
Et lacrimas has quisque domi.

Theb. I, 609: lateri duo corpora parvum
Dependent, et iam unca manus vitalibus haeret
Ferratique unguis tenero sub corde tepescunt.
Theb. V, 150:

Idem animus solare domos iuvenumque senumque
Præcipitare colos plenisque adfrangere parvos
Uberibus ferroque omnes exire per annos.
Praeterea voce *parvi* pro *puero* utitur Statius: Silv. IV,
7, 45; V, 5, 74; Ach. I, 38; Theb. V, 534, 547, 617;
VII, 93; IX. 719, 839, aliis locis.

Alium locum equidem nihil putaverim nisi vera
explicatione indigere, ut sanum eum esse intellegatur.
Silv. II, 6, 39 enim codices haec exhibent:

qualis dubiae post crimina formae
De sexu transire iubent.
In quibus verbis ante omnia quaerendum est, quid *de*
sexu transire significet. Hoc autem discimus e Silv. III,
4, 71, ubi est:

haut ulli puerum mollire potestas
Credita, sed tacita iuvenis Phoebeius arte
Leniter haut ullo concussum vulnere corpus
De sexu transire iubet.

Itaque haec verba significant ex uno in alterum sexum
transire vel e mare feminam fieri. Quod si ad alium

illum locum adhibemus, simplex eorum verborum
sententia haec est: quales pueros habitus desectis vel
compressis genitalibus ambiguus factus feminas se
gerere cogit. Neque de eis verbis, quae sunt *dubiae*
post crimina formae, dubitari potest, cum hanc positionem
verborum vere Statianam esse ex his exemplis concludi
possit:

Sily. III, I, 42: vagae post crimina noctis
Theb. II, 143: illos post verbera fessos
ib. 365: tantus post iurgia mentes

Junxit amor.
Theb. IV, 483: contra per crimina functis

Falsam quoque sententiam videtur mihi Baehren-
sius in Stati verba coniciendo intulisse, cum in prae-
fatione libri III pro eis, quae tradita sunt, verbis:
merebatur et Claudii Etrusci mei pietas aliquod ex studiis
nostris solatium, cum lugeret veris (quod amarissimum est)
lacrimis senem patrem, scriberet: *quod iam rarissimum est*.
Tali enim modo in aequalium mores inveli a Stati usu
plane abhorret neque aliquo modo in eis verbis, quae
codices praebent, offendi potest, cum inter veris et
falsis lacrimis nostris eodem modo atque Stati tempo-
ribus distinguere soleat et ipse poeta de falsis lacrimis
dicat Theb. IX, 601: et falsos quaerit per lumina fletus.

Neque Silv. III, 3, 73 Baehrensi coniectura probari
potest, qua haec verba:

Hinc et in Arctoas tenuis comes usque pruinas
Terribilem affatu passus visuque tyrannum
Immanemque suis, ut qui metuenda ferarum
Corda domant

sic mutavit: *Immanem emollis*, id quod mihi videtur his
exemplis demonstrari:

Sily. II, 5, 3 (de leone mansueto):
Quid tibi constricta mansuescere profuit ira?
Quid scelus humanasque animo dediscere caedes
Imperiumque pati et domino parere minori?
Silv. V, 1, 46:

Illa quidem nuptumque prior taedasque marito
 Passa alio, sed te ceu virginitate iugatum
 Visceribus totis animaeque amplexa fovebat;
 Silv. V, 2, 104:
 Tu, quamquam non ante forum legesque severas
 Passus, sed tacita studiorum occultus in umbra,
 Defensare metus adversaeque tela subisti
 Pellere.
 Theb. II, 451: Non ultra passus, et orsa
 Iniecit mediis sermonibus obvia.
 Theb. III, 341: ea foedera passum
 Regis Echionii,
 Theb. X, 38: vix obvia passi
 Conloquia, amplexus etiam dextrasque suorum
 Excussere umeris.
 Maxime digni qui comparentur hi quoque sunt loci:
 Valer. Flacc. Argon. VIII, 444:
 haud hoc nunc genitor putat, haud dare poenas
 Iam sceleris, dominumque pati.
 Lucan. Phars. IV, 239:
 Sic ubi desuetae silvis in carcere clauso
 Mansuevere ferae, et vultus posuere minaces,
 Atque hominem didicere pati;
 Ex his igitur exemplis, cum saepissime *imperium*
pati, dominum pati vel similia poetae dicant, satis apparet
 ne hoc quidem loco de codicum scriptura decedendum
 esse.
 Reservanda quoque tradita verba propter ipsam
 Stati sententiam videntur Silv. III, 4, 75:
 Nondum pulchra ducis clementia coeperat ortu
 Intactos servare mares; nunc frangere sexum
 Atque hominem mutare nefas; gavisaeque solos
 Quos genuit natura videt,
 Nam cum e Suetoni vita, cap. VII, Domitianum,
 quominus pueri virilitate privarentur, prohibuisse notum
 sit, sententia poetae haec est: Antea hominibus licuit
 e Flavio Flaviam facere, e Clodio Clodiam, nunc nemo

est, nisi quem natura ipsa genuit. Itaque dicendum
 est immerito Baehrensium *solos* mutasse in *totos*.

Neque aliter dissentio a Baehrensi, cum Silv. III,
 4, 96:

patriis nec gratius ullum

Munus erit ipsoque potentius auro,
petitius scripserit pro *potentius*. Nam cum *gratius* et
petitius fere idem significant, ea voce, quae est *potentius*,
 multo plus exprimitur. Potens enim hoc loco illud
 mihi videtur significare, quod cum plurimum efficiat,
 summi preti est, qua cum significatione haec vox his
 quoque locis invenitur: Silv. V, 1, 61:

Si Babylonos opes, Lydae si pondera gazae
 Indorumque dares Serumque Arabumque potentes
 Divitias, mallet cum paupertate pudica
 Intemerata mori vitamque rependere famae.

Theb. VIII, 337:

Ille mihi Delo Cirrhaque potentior omni,
 Quo ruis, ille adytis melior locus.

Eodem modo codicum scripturam servaverim
 Silv. III, 5, 16:

certe lascivia corde

Nulla, nec aut rabidi mulcent te proelia Circi
 Aut intrat sensus clamosi turba theatri;

neque assentior Baehrensi, cum scripserit *dammosi* pro
clamosi. Nam quantus saepe tumultus atque clamor
 in Romanorum theatris fuerit, cum e multis scriptoribus,
 tum e Lucani Phars. VII, 11 cognoscitur:

Nam Pompeiani visus sibi sede theatri
 Innumeram effigiem Romanae cernere plebis,
 Attollique suum laetis ad sidera nomen
 Vocibus et plausu certare sonantes.

De voce ipsa autem clamosi conferre licet:
 Stat. Silv. IV, 4, 18:

Te quoque clamosae quaenam plaga mitior urbi
 Subtrahit?

et Iuv. IX, 144:

et duo sortes

De grege Moesorum, qui me cervice locata
Securum iubeant clamoso insistere Circo.

Neque aliter Silv. III, 5, 74 codicum scripturam
reservandam esse censeo:

hinc auspice condita Phoebo

Tecta Dicarchei portusque et litora mundi

Hospita at hinc magnae tractus imitantia Romae

Quae Capys advectis implevit moenia Teucris.

Neque enim est, quod cum Marklando *mundo* scribamus
pro *mundi*, cum aliis quoque locis vocem hospiti cum
genetivo Statius coniungat, velut Silv. V, 3, 168:

Ausonii pridem laris hospita Cyme

Theb. IX, 228:

stupet hospita belli

Unda viros.

Eundem in modum, dummodo recte distinxerimus,
nulla mutatione egere putaverim finem praefationis
libri Silvarum IV, ubi legimus in codicibus: *quare ergo
plura in quarto Silvarum quam in prioribus? ne se
putent aliquid egisse, qui reprehenderunt, ut audio, quod
hoc stili genus edidissem. primum supervacuum est dissuadere
rem factam, deinde multa ex illis iam domino Caesari de-
deram, et quanto hoc plus est quam edere? exercere autem
iocos non licet? secreto inquit sed et sphaeromachias spectamus
et palaris (vel pilaris) lusio admittit novissime quisquis ex
meis invitatus aliquid legit, statim se profiteatur adversum? ita
quare consilio eius accedam? in summam nempe ego sum qui
traducor taceat et gaudeat hunc tamen librum tu, Marcelle,
defendes et si videtur hactenus sin minus reprehendemur vale.*
Sic enim primum hunc locum legere opus est, ne cuius
animus Baehrensianae editionis scriptura praeoccupetur,
quae prorsus false distincta mihi videtur haec verba
exhibere. Quid enim dicit poeta? Cum audivisset
propter hoc stili genus a quibusdam hominibus se
reprehendi, has vituperationes refutare conatur. Quo-
cum autem colloquitur? Num cum illo ipso, qui eum
vituperaverat? Minime. Nam sic si res se haberet,

dicere debuit: *quare consilio tuo accedam et taceas et
gaudeas*. Nunc autem cum tertia persona Statius utatur,
apertum est cum amico aliquo se colloquentem fingere
poetam de eis rebus, quas tertius aliquis malevolus
in obtrectationem Silvarum dixerat. Quod qui tenebit,
facillime intellet illud *ita in itaque* vel simile quid-
quam mutare non licere. Immo vero sic narrat amicus
Statio malevolum illum iudicasse. Deinde antea certe
ea scriptura probanda est, quam codices novicii (C)
exhibent: *palaris*. Nam *pilaris*, quod Politianus adno-
tavit, primum aliis locis omnino non invenitur, sed a
pila derivari solet *pilaris*. Ceterum *palaris* multo
melius mihi videtur ad id quadrare, quod Statius dicere
vult. Ut enim gladiator — haec est poetae sententia —
etiamsi non contra verum adversarium, sed contra
palum pugnet, tamen propter artem suam maximam
apud spectatores admirationem nancisci potest, sic
Status quoque in hoc quasi lusorio carminum genere,
quamvis longe absit a sublimibus epicis carminibus, arti-
ficem putat se praestare posse. Ultima autem verba
Baehrensius prorsus convertit atque confudit, sic ut
illa intellegi paene omnino non possint. Nec tamen
quidquam hic mutandum esse concludere licet e fine
praefationis libri II, ubi est: *haec qualiacumque sunt,
Melior carissime, si tibi non displicuerint, a te publicum
accipiant; si minus, ad me revertantur.* —

Totum igitur hunc locum sic distinguendum esse putem:
exercere autem iocos non licet?

secreto' inquit.

*sed et sphaeromachias spectamus et palaris lusio admittit
novissime: quisquis ex meis invitatus aliquid legit, statim se
profiteatur adversum?*

ita'.

*quare consilio eius accedam? in summa nempe ego sum
qui traducor. taceat et gaudeat!*

*Hunc tamen librum tu, Marcelle, defendes et, si videtur,
hactenus! sin minus reprehendemur, vale!*

Iam cum propter artem palaeographicam, tum poetae sententiam Silv. IV, 3, 89:

Ne me pulvereum gravemque caeno

Tyrrheni sinus obruat profundum
rectius *obruat* legi putaverim quam id, quod Baehrensius scripsit, *abluat*. Gaudet enim Vulturinus fluvius, quod, ut est v. 91, nitentibus undis feratur; huic autem nihil opponi potest nisi quod gravis caeno mari obruatur vel mergatur. De verbo autem illo obruendi fortasse non supervacuum est comparare hos locos:

Silv. I, 6, 22:

Non tantis Hyas inserena nimbis

Terras obruit aut soluta Plia

Silv. V, 5, 53: ignosce, puer, tu me caligine maestum
Obruus a! duro.

Theb. II, 566: Stupet obvia leto

Turba superstantem atque emissi turbine montis
Obruitur;

Theb. V, 183: una gravi penitus latet obruta caelo
Lemnos.

Theb. VI, 859:

(*collis scrutator Hiberi*) latet intus monte soluto
Obrutus.

Theb. IX, 536:

Illam (*quercum*) nutantem nemus et mons ipse tremescit,
Qua tellure cadat, quas obruat ordine silvas.

Nec minus Silv. IV, 3, 159 Stati verba a Baehrensio corrupta esse mihi videntur:

Et laudum cumulo beatus omni

Scandes belliger abnuesque currus,
ubi *abnues* et a Politiano et codicibus C traditum est, quoniam *abimes* nihil aliud est atque *abnues*. Errat igitur Baehrensius, si in tanto codicum consensu scribit *adnues*. Nam *scandere currus* et *adnuere* prorsus fere idem est, cum *abnuere* contrarium sit et maximam gradationem significet. Dicit enim hic poeta: sive triumphum accipies, sive recusabis, quod suo iure eum dicere ex

historicorum libris satis notum est. Ceterum de hac re Statius ipse saepius verba facit ut Silv. IV, 1, 39 de eodem Domitiano dicit:

Mille trophaea feres, tantum permitte triumphos.

Ac ne Silv. IV, 4, 56 quidem, id quod Marklandus fecit, de codicum scriptura decedam, sed sic fortasse hic legendum est:

At tu, si longi cursum dabit Atropos aevi
(Detque precor Latiiue ducis sic numina pergant,
Quem tibi posthabito studium est coluisse Tonante,
Quique tuos alio subtexit munere fascas
Et spatia obliquae mandat renovare Latinae),
Forsitan Ausonios ibis frenare cohortes
Aut Rheni populos aut nigrae litora Thules
Aut Histrum servare datus metuendaque portae
Limina Caspiacae.

Similiter res se habet Silv. IV, 4, 79:

Haec ego Chalcidicis ad te, Marcelle, sonabam
Litoribus, fractas ubi Vesuvius erigit iras,
Aemula Trinaeriis volvens incendia flammis.

Traditum hic enim est *eriget*, id quod Avantius mutavit in *egerit*. Mihi vero recte videntur docti Itali *erigit* scripsisse. Nam etiam Vergilius hac voce erigendi simillimo modo usus est, velut Aen. III, 576: (de Aetna)

Interdum scopulos avolsaque viscera montis
Erigit eructans

Aen. IX, 239: aterque ad sidera fumus
Erigitur;

Statius autem alio loco dicit, Theb. VII, 671:

Qualis ubi primam leo mane cubilibus atris
Erexit rabiem

et Sil. Pun. IV, 278:

(*Cryxus*) horrissonis ululatibus erigit iras.

Quam ob rem facere non possum, quin hoc quoque loco *erigit* scribendum esse putem.

Eundem in modum prorsus sanus est locus, qui exstat Silv. IV, 6, 36, distinguendus vero mea quidem sententia sic est:

Haec inter castae genius tutelaque mensae
Amphitryoniades multo mea cepit amore
Pectora nec longo satiavit lumina visu:
Tantus honos operi finesque inclusa per artos
Maestas! deus ille, deus! seseque videndum
Indulsit, Lysippe, tibi.

Dicit enim Statius his verbis: profecto hic deus est, sed tamen, quamquam dei ab hominibus non conspici solent, tibi, Lysippe, se dedit videndum. Similiter autem ut hic *deus ille, deus!* saepissime Statius dicit, velut Silv. V, 1, 237: *domus ista, domus!* Silv. V, 5, 69: *meus ille, meus!* Ach. I, 528: *meus iste, meus!* Theb. V, 751: *deus iste, deus!* aliis locis. Neque quidquam in eis verbis, quae sunt *seseque videndum*, mutandum esse satis apparet e Silv. II, 6, 76, ubi de Rhannusia dicit poeta:

Heu misero letale favens seseque videndo
Torsit etc.

Ac ne v. 65 quidem eiusdem carminis videtur mihi Baehrensium recte intellexisse, immo vero equidem sic eum legendum esse putaverim:

Hinc acies semper victor narrabat opimas,
sic ut Statius dicat: Inde Alexander, quia Hercules eum tutabatur, semper victorias narrare potuit, h. e. semper vicit, id quod solum ad eum versum, qui antecedit, videtur quadrare:

Semper ab hoc animos in crastina bella petebat,
Acie opima autem, quod Baehrensium scripsit, nullo modo ferri postet, ne verbum illud narrandi obiecto egeat. Animadvertendum autem est, etiamsi apud alios quoque scriptores invenitur, aciem in Stati libris saepissime idem fere esse atque pugnam, ut Silv. I, 4, 89; IV, 2, 66; Theb. III, 72; XII, 639, aliis locis plurimis.

Fides quoque codicibus habenda est Silv. V, I, 202—206:

qualis inspecta coniuge segnis
Odrysius vates positus ad Strymona plectris
Obstupuit tristemque rogam sine carmine flevit.
Ille etiam erecte rupisset tempora vitae
Ne tu tartareum chaos incommutata subires.

Quorum verborum primum Barthius offendit in primo versu diceus: *Quid enim ad furem et sibi ipsi imminuentem in extrema pericula dolorem Abascenti segnitias?* et pro eis, quae tradita sunt, scribens:

qualis inspecto coniugis igni
Quam coniecturam Baehrensium, ut mihi quidem videtur, immerito in contextum recepit. Nam ut illud verbum, quod est *segnis*, ad Abascentum fortasse non quadrat, ita multo minus verba, quae sequuntur, *positus ad Strymona plectris* et *obstupuit* de Stati amico dici possunt. Itaque si vera esset Barthii sententia, haec omnia mutari opus esset. Nunc autem respiciendum est unum e multis similibus illis epicis hoc esse, in quibus poetas non id spectare, ut omni modo eae res, quae comparantur, inter se convenient, immo vero sat habere, si copiosis verbis simile describant, inter omnes constat. Quam ob rem nullo modo Barthii coniectura probanda est. Aptissime enim ea, quae tradita sunt, de Orpheo dicuntur. Nam omnibus fere de Orpheo imaginibus et fabulis haec vox, quae est *segnis*, comprobatur, quippe quae vatem illum, cum sua ipsius culpa solus e Tartaro redisset, omnes voluptates contempsisse doceant, nec non quadrat ad ea, quae praeterea hic de illo dicuntur: *positus ad Strymona plectris* et *obstupuit*. Deinde mirabilis est Baehrensi coniectura, qua in IV horum versuum pro *erecte*, quod codices videntur exhibere, scribit *maestas*, cum quantum ad artem palaeographicam attinet minimam habeat probabilitatem. Ceterum vox illa erecti apud Statium saepissime invenitur, ut Theb. XI, 728:

ego erectum subigam et servire docebo.
Theb. IV, 382: et ardens

Erectam attonitis implet clamoribus urbem.
Ach. I, 235, 764; II, 34; Theb. I, 186; II, 506; V, 95; VI, 734; X, 415, aliis locis. Saepissime erigendi quoque verbum translata cum significatione apud Statium exstat. Sed haec omnia fortasse laud ignoravit Baehrensius, cum alio loco ipse hanc vocem coniecerit: Silv. IV, 8, 6:

Nec solum festas erecta Neapolis aras
Ambiat,
ubi traditum est: *secreta*. Itaque in eo fortasse hic homo doctus offendit, quod in lexicis ad hanc vocem, quae est *erecte*, adnotatur nisi comparativa forma eam non inveniri. Sed primum haec eorum, qui lexica conscripserunt, doctrina duobus solum scriptoribus nititur, Ammiano et Gellio, deinde cur Statius, qui tot tantisque rebus ab aliis abhorreat, hoc quoque loco in re tam pusilla de solito verborum usu secedere non possit, intellegi nequit, praesertim cum hoc verbum ad reliqua aptissime videatur quadrare. Dicit enim poeta: Tu, Abascante, cum uxor tua esset mortua, similis eras Orpheo. Nam, ut ille fecit, nihil aliud agere poteras nisi dolori tuo indulgere. Nec vero solum ei similis eras, sed si tu Orpheus fuisses, longe maiora illo fecisses. Tu enim fortiter vitam abieccisses, ut in aeternum cum uxore coniunctus fuisses, cum ille mortis timore adductus vivus in Tartarum descendit. Hanc enim Stati esse sententiam clarissime apparet e Platonis Convivio, 179 D.: οὐτις καὶ θεοὶ τὴν περὶ τὸν ἔρωτα σπονδὴν τε καὶ ἀρετὴν μάλιστα τιμῶσιν. Ὀρφεὺς δὲ τὸν Οἰάχρον ἀιελὴ ἀπέπεμψαν ἔξ Ἀιδου, γάσμα δεῖξαντες τῆς γυναικός, ἐφ' ἣν ἦκεν, αὐτὴν δὲ οὐ δόντες, ὅτι μαλθακίζεσθαι ἐδόκει, ἅτε ὢν κισσαρῶδός, καὶ οὐ τολμᾶν ἕνεκα τοῦ ἔρωτος ἀποθνήσκειν, ὥσπερ Ἀλκίσις, ἀλλὰ διαμνηχανᾶσθαι ζῶν εἰσιέναι εἰς Ἀιδου. τοιγάρτοι διὰ ταῦτα δίκην αὐτῷ ἐπέθεσαν καὶ

ἐποίησαν τὸν θάνατον αὐτοῦ ὑπὸ γυναικῶν γενέσθαι. Orpheus igitur ἐμαλθακίζετο καὶ οὐκ ἐτόλμα ἀποθνήσκειν tu autem — et quid potest hic aptius dici, quam id, quod traditum est? — *erecte*, id est fortiter, pro coniuge mortuus esses. Quam ob rem, ut dixi, nihil hoc loco mutandum esse crediderim.

Reservandam quoque codicum scripturam esse puto Silv. V, 2, 11—14:

etiamne optanda propinquis
Tristia, ut octonos bis iam tibi circuit orbes
Vita? Sed angustis animus robustior annis;
Succumbitque oneri et mentem sua non capit aetas.
In quibus verbis primum Baehrensi coniectura, qua scribitur *haec* pro *ne*, non est probanda, cum neque ad artem palaeographicam probabilis videatur neque ullo modo sententiam mutet. Nam interrogationem in his verbis inesse apertum est. Sententia enim poetae haec est: Secedis Roma, puer, quamquam nondum ad stipendia facienda. Hic interrogaverit quispiam: Et tamen iam secedis, etsi annum duodevicesimum nondum agis? Certe, respondet poeta, nam etiamsi annis puer, mente vir es. Eodem modo recte tradita esse mihi videntur ea verba, quae sequuntur:

Succumbitque oneri et mentem sua non capit aetas.
Quae mirum in modum homines docti non intellexerunt. Nec tamen hic locus ulla eget mutatione. Hoc solum sciendum est libenter Statium subiectum in fine totius sententiae ponere, ut Silv. IV, 6, 58:

tenet haec marcentia fratris
Pocula, at haec saevae meminit manus aspera caedis;
Sustinet et cultum Nemeaeo tegmine saxum,
ubi *sustinet* significat *fundamentum est* et subiectum huius *sustinet* non est *manus*, sed *saxum*. Hoc igitur loco, Silv. V, 2, 14, post vocem illam, quae est *annis*, graviter interpungendum et ad verbum illud *succumbit* subiectum sumendum est *aetas*.

Nec minus Statium ipsum, non codices corrigit, vel potius corrumpit, qui Silv. V, 2, 54 aliquid mutare velit: tu disce patrem, quantusque negantem

Fluctibus occiduis fessoque Hyperione Thalen

Intrarit mandata gerens,
etsi Domiti Calderini correcturam, *fessoque* pro *fessusque*, sine ullo dubio accipere debemus. Cetera vero omnia plana sunt atque aperta, dummodo sciamus verbum negandi apud Statium, ut apud alios quoque scriptores, absolute usurpatum significare *resistere* vel *repugnare*, id quod ex his exemplis appareat: Silv. III, 1, 124:

Praecipuus sed enim labor est excindere dextra

Oppositas rupes et saxa negantia ferro.

Theb. II, 669: Ast tamen illi

Membra negant, lassusque ferit praecordia sanguis.

Theb. IV, 124: dexter Iaccho

Collis, et Ennaeae Cereri negat

Hoc autem loco, Silv. V, 2, 54, eo facilius hoc potest intellegi, quia ex illo, quod sequitur, verbo intrandi facillime substantivum introitus ad *negantem* suppleri potest. Eundem autem in modum hoc verbum negandi Imhofius explicavit *Emend. Statian.* p. 3. Erravit vero ille homo doctus, cum scribere vellet *Hyperioni*. Neque enim fluctibus et soli repugnat Thule, sed haec instrumenta sunt, quibus hominibus aditum petentibus resistit. Iam vero *fluctibus* in *lucibus* nulla alia causa mutavit Baehrensius nisi quod *fluctibus* ad coniecturam illam *nigrantem* non quadrabat. Praeterea autem falsam hanc coniecturam esse vel eo evincitur quod *lucibus* occiduis et *fesso Hyperione* prorsus idem esset.

Difficilior fortasse quaestio est, num Silv. V, 3, 23 quoque notique modos extendis Arati codicum scriptura reservanda sit, ubi Baehrensius scripsit *doctique*. Mihi vero hoc verbum noti hic non eo sensu intellegendum videtur, quo est *illustris*, *celeber*, sed ut id significet, quod quis optime noverit vel qua in re maxime versatus sit. Itaque mente

suppleri potest *tibi*, velut Statius dicit Silv. IV, 4, 101:
et penitus noti tibi vatis amorem

Corde exire veta.

Nam hoc sensu saepius apud hunc poetam *notus* reperitur, ut Ach. I, 572: modo dulcia notae

Fila lyrae tenuesque modos et carmina monstrat
Chironis

Theb. II, 66: gemuit prope limina nati

Laius et notos cunctatur inire penates.

Theb. III, 330: Sic nota in pascua taurus

Bellator redit

Theb. IX, 605: (de Atalanta)

notasque ex ordine silvas

Et quercum gavisa videt.

Alio loco, Silv. V, 3, 211:

nec enim mihi sidera tantum

Aequoraque et terras quam vos debere parenti,
confitendum mihi est me non intellegere, quid Baehrensius
Statium hic dicere putaverit, cum scripserit:

nec enim sibi sidera tantum

Aequoraque et terras quam nos debere parenti.

Sed fortasse hoc omnino non opus est, cum Stati verba, sic ut codicibus tradita sunt, facillime intellegantur neque ulla mutatione egeant. Dicit enim poeta: Equidem non tanti aestimo patrem me genuisse, quanti artem carmina pangendi ab eo me accepisse: hanc ob causam maximas gratias ei habeo.

Sermonem Statianum autem Baehrensius mihi videtur parum respexisse Silv. V, 4, 11:

Unde ego sufficiam? non si mihi lumina mille,

Quae sacer alterna tantum statione tenebat

Argus,

cum scriberet ille homo doctus:

non sunt mihi lumina mille.

Nam contra hanc Baehrensi coniecturam multi loci afferri possunt, quibus simillimum in modum poeta dicit, ut Silv. I, 1, 40: nec dulcior usquam

Lecta deae sedes, nec si, pater, ipse teneres
Pectora, quae mundi valeant evolvere curas,
quamquam hic quoque a doctis Italis si in sic mutatum
est. Silv. I, 2, 38:

Digna quidem merces, et si tibi Iuno labores
Herculeos, Stygiis et si concurrere monstis
Fata darent, si Cyaneos raperere per aestus.
Silv. I, 4, 128: qua nunc tibi pauper acerra
Digna litem? nec si vacuet Mevania valles,
Aut praestent niveos Clitumna novalia tauros,
Sufficiam.

Silv. IV, 2, 8: quas solvere grates
Sufficiam? non, si pariter mihi vertice laeto
Nectat odoratas et Smyrna et Mantua lauros,
Digna loquar.

Theb. V, 569: At non mea vulneraumquam
Effugies

Non, si consertum super haec mihi membra Giganta
Subvelheres.

Verumtamen, quamvis saepe recte Stati verba
codicibus manuscriptis tradita sint, tamen nimirum
non desunt loci, qui emendationem expectent. E quibus
iam paucos afferam et sanare temptabo.

Ac primum quidem aggrediamur, si placet, ad
primi libri Silv. praefationem, cuius finem mutilatum
equidem non recte puto a Baehrensis suppletum esse.
Is enim ad ultima, quae tradita sunt, verba: *in fine
sunt Kalendae Decembres, quibus utique creditur: noctem
enim illam felicissimam et voluptatibus publicis inexpertam
addidit celebrant. vale.* Ego vero hic contra Baehrensium
contendo: non celebrant! Nam siquis ad illud carmen,
quod exstat Silv. I, 6 propius accesserit, inveniet usque

ad v. 84 diem, non noctem Statium celebrare. v. 85
demum initium noctis habemus et paulo post finem
totius carminis. Mirum igitur esset, si Statius diceret
noctem illam se hoc carmine canere. Deinde quae haec
causa est: Huic carmini utique creditur brevi temporis
spatio illud factum esse, quia noctem illam celebrat?
Nonne eandem ob causam totum annum Statius in
illud carmen consumpsisse potuit? Itaque utcumque
Stati verba hic fuerunt, *celebrant. vale.* non scripsit poeta,
sed talia fere hic exstitisse suspicor: (*noctem enim illam
felicissimam et voluptatibus publicis inexpertam*) *certe
amplius celebrassem, nisi vino et totius diei oblectationibus
nimis fessus fuisset.* Hoc enim v. 95, 96 maxime illius
carminis mihi videtur indicari:

Iam iam deficio tuoque Baccho

In serum trahor ebrins soporem.

Utrumque autem, et diem et noctem, Statium celebra-
tum fuisse apparet ex eis, quae in initio huius car-
minis v. 7, 8 poeta dicit:

dum refero diem beatam

Laeti Caesaris ebriamque noctem.

Sic enim hoc loco legendum esse putaverim et *partem*,
id quod pro *nocte* traditum est, glossema docti cuius-
piam hominis mihi videtur esse, qui de altera huius
carminis parte idem quod ego sensit.

Iam transeamus ad Silv. I, 4, 60:

Tunc dens Alpini qui iuxta culmina dorsi

Signat Apollineos sancto cognomine lucos,

Respicit heu tanti † precidem securus alumni.

Corruptas enim illas litteras *precidem* perperam
Baehrensius mihi videtur mutasse in *residens*, ut de
alia illa falsa coniectura *pridem* taceam. Primum enim
ad participium illud *residens* non adiectivum, sed
adverbium *secure* postularetur. Deinde verbo illi
respiciendi obiectum deest, id quod comparatis his
locis ferri nequit:

Theb. III, 159: Respexit Lucina domum

Ov. fast. IV, 162:

Semper ad Aeneadas placido, pulcherrima, voltu

Respice, totque tuas, diva, tuere nurus.

Inde concludere licet in corruptis his litteris obiectum
verbi respiciendi latere et cum antea legamus (v.
56, 57):

hinc fessos penitus subrepsit in artus

Insidiosa quies et pigra oblivio vitae.

scripsisse hoc loco Statium puto:

Respicit heu tanti requiem securus alumni.

Paulo post in eodem carmine alia inest corruptela.

Legimus enim v. 63: Teneamus adorti

Tendatis iam fila colos.

Corruptum autem illud verbum, quod est *tendatis*, ante
me iam Baehrensius emendavit in *tendantis*, quamquam
hanc coniecturam in contextum non recepit. Comparare
enim licet non solum illum, quem Baehrensius affert,
locum: Silv. V, 1, 156:

tenuantur dura sororum

Licia et exacti superest pars ultima fili.

sed etiam Ach. I, 581:

Et tenuare rudes attrito pollice lanas

Demonstrat reficitque colus et perdita dura

Pensa manu;

et Ach. I, 635:

Ast ego pampineis diffundere brachia thyrsis

Et tenuare colus (pudet heu taedetque fateri!)

Iam scio.

Necdum tamen sanus hic locus est. Nam si colus fila
diminuunt, cur Apollo eas tenere vult? Immo vero
amplificare, extendere eas deum opus est, ut Statius
Silv. III, 1, 172 Herculem dicentem facit:

Extendamque colus (duram scio vincere mortem).

Scripsit igitur fortasse Statius hoc loco:

Tendamus adorti

Tendantis iam fila colos.

Permutatis deinde duabus his vocibus errore librarii

primum scriptum erat:

Tenvamus adorti

Tendantis iam fila colos.

et postea ex illo *tenvamus* fiebat *teneamus*. Ceterum
litteras illas *u* et *i* saepius consonantum more a Statio
usurpari Otto Mueller docuit l. l. p. 13, qui hos locos
recte attulit:

Silv. I, 4, 36: Sperne coli tenuiore lyra.

Theb. V, 597: Rapta cutis, tenuia ossa patent

Theb. VI, 181: Obnubit tenuia ora comis,

Theb. VIII, 156: sed torpet iter falluntque ruentes

Genua viros.

Theb. XII, 2: et instantem cornu tenuiore videbat

Luna diem.

Deinde v. 85 eiusdem carminis aliter interpun-
gendum esse crediderim atque Baehrensius fecit, sic
ut legamus:

Libyci quid mira tributi

Obsequia et missum media de pace triumphum

Laudem et opes? Tantas nec qui mandaverat ausus

Exspectare fuit.

ne verbo illi exspectandi obiectum desit.

Gravior est corruptela, quae exstat Silv. II, 1, 67:

Muta domus fateor desolatique penates

Et situs in thalamis et maesta silentia mensis.

Hic enim neque Marklandi coniecturam *pariter* pro
illo *fateor*, neque Baehrensi *stat ero* veram esse puto,
cum domus in universum dicta non possit opponi eis,
quae sequuntur, penatibus, thalamis, mensis, quippe
quae in domo insint. Sed animadvertas velim, quanta
arte Statius has res describat. Nam v. 62—64:

Quis matutinos abrumpet murmure somnos

Impositus stratis abitusque morabitur artis

Nexibus adque ipsos revocabit ad oscula postes?

Atedium Meliorem fingit abeuntem, deinde v. 65
redeuntem:

Obvius intranti rursus quis in ora manusque

Prosiliet brevibusque humeros circumdabit ulnis?

postremo in domum ingredientem, ubi deinceps

enumerantur atrium cum penatibus, thalami, mensae. Itaque in eo, de quo agimus, verbo latere aliquid opus est, quo pars domus significetur et haec pars, quoniam primo loco commemoratur, nulla esse potest nisi externa, quam is, qui ad domum venit, primam videt. Quam ob rem aptissime puto scribi posse:

Muta domus facies desolatique penates.

Multum quoque laboris alii eiusdem carminis loco homines docti impertiverunt, qui in codicibus v. 129 sic legitur: brevibus constringere laenis

Pectora et angusta telas artare lacerna

Enormes non ille sinus, sed etc.

nec tamen is adhuc emendatus est. Nam Marklandi coniectura, qua scribitur *sinens* pro *sinus*, quamvis placida primo obtuto videatur, tamen eam ob causam ferri nequit, quia aut obiectum desideratur, quo indicetur, quemnam herus pueri pectora artare non siverit, aut scribere opus esset *artari*. Ceterae autem Marklandi mutationes:

angustos artus iactare lacerna

Enormi non ille sinens

a Stati sententia etiam plane abhorrent, cum non de angustis artibus, immo vero de maximis dicat poeta. Iam id, quod Peyraredus proposuit *talos artare*, paene ridiculum est. Quoniam enim modo tali miseri illius pueri lacerna tangi potuerint, intellegere nemo potest. Ac ne Baehrensius quidem veram Stati scripturam invenit, cum coniceret:

et angusta talari artare lacertos

Enormes non ille sinens

Nullo enim modo talaris tunica angusta appellari potest, cum amplissimum esset vestimentum atque ad pedes effusum. Lacerna autem, quam vocem codices exhibent, parvula erat vestis et quae praecipue a pueris gestabatur, sic ut optime illam ad hunc locum quadrare putem. Atque omnino omnia, quae tradita sunt, aptissima videntur excepta una illa corrupta voce

telas. Haec autem e quibus litteris corrupta sit, concludere licet comparato eo loco qui exstat Silv. III, 1, 117, ubi *tela* pro *templa* codices exhibent. Quapropter hic ego puto pro *telas* scribendum esse *temptans*, ut id participium habeamus, cui insequens illud *texta legens* coordinatum sit. Totus igitur locus sic velim legatur:

brevibus constringere laenis

Pectora et angusta temptans artare lacerna

Enormes non ille sinus, sed etc.

Ac ne quis de collocatione verborum, quae sunt:

Enomes non ille sinus,

miretur, comparandos afferam hos locos: Theb. IV, 608:

Stabat inops comitum Cocyti in litore maesto

Laius, immiti quem iam deus ales Averno

Reddiderat, dirumque tuens obliqua nepotem

(Noscit enim vultu) non ille aut sanguinis haustus

Cetera ceu plebes, aliumve accedit ad imbrem,

Immortale odium spirans.

et Theb. VI, 807:

Sic otia Martis

Degere et armiferas laxare adsueverat iras

Ingentes contra ille viros Acheloia circum

Litora felicesque deo monstrante palaestras.

Nunc ad proximum carmen accedamus, cuius v. 125 emendatione adhuc eget:

Quem non ambigui fasces, non mobile vulgus,

Non leges, non castra tenent, qui pectore magno

Spemque metumque domas † tuto sublimior omni,

Exemptus fatis

Neque enim Domiti Calderini coniectura *vitio*, neque Baehrensi *astu* poetae sententiae satis facit, sed longe maiorem honorem Statius amico suo tribuit. Dicit enim: Sublimior es, quam qui cōsul vel praetor vel tribunus militum vel alio ullius magistratus titulo appelleris. Quam ob causam mihi videtur scribendum esse:

Spemque metumque domas titulo sublimior omni,

Pulchrior haut ulli triste ad discrimen ituro
Vultus et egregiae tanta indulgentia formae.
et Theb. IX, 699—706:

(*Haec quoque de Parthenopaeo*) Ast ubi pugna
Cassis anhela calet, resoluta vertice nudus
Exoritur: tunc dulce comae radiisque trementes
Dulce nitent visus et, quas dolet ipse morari,
Nondum mutatae rosea lanugine malae.

Nec minus ex his locis mihi videtur apparere ea verba,
quae mutaverunt homines docti, *bellis* et *visu*, ipso suo
loco esse. Contra solum illud *iam* superfluum et ineptum
est. Hoc autem verbum saepius in ipsis Stati libris
ex aliis corruptum est, ut Silv. I, 1, 30 e *me*. Itaque
hic *sine* pro *iam* legendum esse putaverim:

qualis bellis sine casside visu

Parthenopaeus erat.

Hoc enim acerrimum *ὀξύμωρον* (*bellis* — *sine casside*)
optime quadrat ad ea, quae praeterea hic dicit Statius:
torvus atque virilis puer erat, sed tamen gratus, blandi
eius oculi, sed severo igne, erinis eius horrens, sed
tamen decorus. Nam *sine casside* oppositum est usita-
tiori illi *sub casside*, quod de eo dicitur, qui ad bellum
paratus est, ut Theb. VII, 242:

Et formidandos monstrant sub casside patres.
et Theb. XI, 408:

Stat consanguineum campo scelus, unius ingens

Bellum uteri, coeuntque pares sub casside vultus.

Praeterea autem animadvertendum est hanc positionem
verborum, qua substantivum aliquod cum praepositione
sine coniunctum inter duo alia nomina collocatur,
maxime Statanam esse. Licet enim comparere:

Silv. III, 1, 44: insontes invenum sine caestibus irae
Theb. V, 325: maestam sine culmine Lemnon

Theb. 333: It truncum sine honore pecus.

praeterea Theb. VIII, 403; IX, 29, 720; X, 12, 656;
XI, 664; XII, 358, 470, 583, 729.

Proximo quoque carmine facilius, quam adhuc
factum est, locus, qui exstat v. 128, sanari potest. Ibi
enim in codicibus traditum est:

Haec te non thyasis procax dolosis
Falsi numinis induit figura,
Ipsum sed colit et frequentat ipsum
Imis altius insitum medullis,
Ac solatia vana subministrat
Vultus, qui simili notatus auro
Stratus praenitet incubatque somno
Securae.

Neque enim hic *vana* in *vera* mutare licet, ut Baehrensium
fecit, sed illud, quod praecedat *non*, postulare mihi
videtur, ut scribatur:

Nec solatia vana subministrat
Vultus

Infra autem pro ea voce, quae est *stratus*, videlicet
necessario scribitur *stratis*, ne verbo, quod sequitur,
praenitet desit, quo referatur. Sic enim iam Domitius
emendavit, sed nescio quo errore Baehrensium hoc
effugit.

Coniectura egere Silv. III, 1, 160 quoque putaverim
et sic fortasse hic legendum est:

Nam capiet tantum nec degenerabit honorem
pro eis, quae tradita sunt:

Nam capit et tantum non degenerabit honorem.
Inconcinuitatem enim horum verborum ferri non posse
iam Gronovius sensit, etsi veram emendandi viam mihi
non videtur invenisse.

Pluribus autem dicendum est de Silv. III, 5, 28,
qui locus in codicibus sic legitur:

Et semel insertas non mutaturus habenas
Usque premo. Ter me nitidis Albana ferentem
Dona comis sanctoque indutum Caesaris auro
Visceribus complexa tuis etc.

Minime enim probo Baehrensi coniecturam, qui scripsit:
Usque fero. Tu me nitidis Albana prementem

Neque enim comis corona premitur, sed versa vice
comae corona premuntur, ut dicit Vergilius: Aen.
IV, 148: mollique fluentem

Fronde premit crinem.

Praeterea autem in ea voce, quae est *ferentem* prorsus
nihil est offensionis, sic ut certissime illa servanda sit.
Alia res est in altera ea voce, quae est *premo*, aut, ut
Baehrensius coniecit, *fero*. Neutra enim videtur apta
esse. Sed animadvertas velim, quod insequenti verbo
ter pro *tu* scriptum est, id quod sic vix corrumpi
potuit. Immo vero *ter* puto corrigendi causa supra
premo scriptum fuisse et inde in lineam irrepsisse.
Postremo ut versus fieret, *tu* post *ter* librarius aliquis
delevit. Quam ob rem Statium crediderim scripsisse:

Et semel insertas non mutaturus habenas

Usque tero. tu me nitidis Albana ferentem

Dona comis etc.

Habenas terere autem aptissime dicitur, cum de frenis
in os insertis vel impositis Statius hic verba faciat,
qualia equorum dentibus mordentur et retinentur et
cum haec vox terendi aliis quoque locis inveniatur,
velut: Theb. VIII, 393:

(*Cornipedes*) sic frena terunt, sic proelia poscunt

Hinnitu

Lucan. Phars. IV, 752:

(*Sonipes*) rigidos vexantia frenos

Ora terens.

Ac ne v. 34 quidem eiusdem carminis Baehrensius
emendavisse mihi videtur, quem sic codices exhibent:

tu procurrentia primis

Carmina nostra sonis, totasque in murmure noctes,

Aure rapis vigili.

Nam si idem homo doctus hic

totas quin murmura noctes

vel

totasque en murmura noctes

legendum proponit, mihi quidem et illud *en* prorsus
ineptum videtur et ne illud *quin* quidem habet, quo

nitatur. Veram autem lectionem hanc esso puto:
tu procurrentia primis

Carmina nostra sonis, totas quae in murmure noctes,
Aure rapis vigili.

Nam verbum illud immurmurandi saepius apud Statium
invenitur, ut Theb. I, 532: tacitaeque immurmurat aure.
et Theb. XI, 63: terraeque immurmurat absens
Nomen.

Jam vero Silv. IV, 1, 41:

nondum gremio Iovis Indica laurus,

Nondum Arabes Seresque rogant.

non recte fecisse Baehrensium puto, quod Livinei
coniecturam receperit, qua particula *in* ante *gremio*
inseritur. Neque enim video, quomodo verbum illud
rogandi sine ullo obiecto intellegi possit et hanc ob
causam equidem legere malim:

nondum gremium Iovis Indica laurus,

Nondum Arabes Seresque rogant.

Deinde occurrit mihi alius locus, quem emendare
posse mihi videor. Silv. IV, 3, 19 enim in codicibus
legitur:

Qui reddit Capitolio Tonantem

Et pacem propria domo reponit,

Qui genti patriae futura semper

Sancit lumina Flaviumque calvum.

In quibus duae certe voces emendatione egent. Primum
enim *lumina* illa intellegi nequeunt. Sed multo veri-
similius est *limina* scripsisse Statium, quam id, quod
Baehrensius voluit, *culmina*. Nam sciendum est semper
fere codices illos, quos Baehrensius littera C signavit,
lumina pro *limina* exhibere, ut Silv. III, 1, 9 et 105;
IV, 2, 61, aliis locis. Eam ob causam Silv. quoque
I, 5, 41 scribendum est secundum collationem Politiani:

non limina cessant,

non, ut C habent, *lumina*.

Maior vero alia illa quaestio videtur, quid insequenti
illi voci calvi faciendum sit. Domitius Calderinus enim

hoc in voce non offendit, sed explicavit: *Alludit ad Domitianum, qui calvus erat.* Sed mirabilis haec esset allusio et vix calva domus vocari potest. Praeterea bene cavisset procul dubio Statius, ne talibus verbis iram tyranni lacesseret, neve in se converteret, quoniam Domitianus, ut docet Suetonius Domitiani vita, cap. XVIII, *calvitio ita offendebar, ut in contumeliam suam traheret si cui alii ioco vel iurgio obiectaretur.* Ac ne aliorum quidem hominum doctorum coniecturas, *culmen, caelum, cultum*, Stati verba reddere putaverim. Immo vero hac in voce adiectivum latere suspicor, sic ut Flavium notum illud amphitheatrum gentis Flaviae significet. Hoc autem adiectivum quidnam sit quaerentibus nobis exeundum certissime est ex alio illo praecedent adiectivo: *semper futura.* Quam ob rem aptissime scribi posse putem:

Flaviumque saluum.

Confitendum quidem mihi est exempla huius vocis, quae est Flavium, afferre me non posse. Attamen aliis causis nec non gravissimis magnopere ad hanc suspicionem addueor. Primum enim notum est plurima theatra Romana incendio deleta esse, ut etiam primum illud saxeum Statili Tauri Nerone imperatore igne interiit. Iam id quod summum est, nonnullis annis antequam Statius haec scripsit, maxima pars aedium publicarum Romae magno illo anni LXXX Tito imperatore incendio deleta erat, qua de re dicit Xiphilinus vel potius Dio Cassius 66, 24: *πῦρ δὲ δὴ ἔτερον ἐπίγειον τῷ ἑξῆς ἔτει πολλὰ πάντῃς Ῥώμης, τοῦ Τίτου πρὸς τὸ πάθος τὸ ἐν τῇ Καμπανίᾳ γενόμενον* (eruptionem Vesuvi montis dicit) *ἐκδημίσαντος, ἐπενείμαιο.* καὶ γὰρ τὸ Σεραφεῖον καὶ τὸ Ἰσεῖον, τὰ τε Σεπτά, καὶ τὸ Ποσειδώνειον, τὸ τε βαλανεῖον τὸ τοῦ Ἀργίππου, καὶ τὸ Πάνθειον, τὸ τε Διοβρωρίον, καὶ τὸ τοῦ Βάλβου θέατρον, καὶ τὴν τοῦ Πομπηίου σκηνήν, καὶ τὰ Ὀκταούσια οἰκήματα μετὰ καὶ τῶν βιβλίων τὸν τε νεὼν τοῦ Διὸς Καπιτωλίου μετὰ τῶν συννάων αὐτοῦ κατέκαυσεν. οὕτω τὸ κακὸν οὐκ ἀνθρώπινον,

ἀλλὰ δαιμόνιον ἐγένετο. πάρεστι γὰρ ἐκ τούτων ὧν κατέλεξα παντὶ τῷ τεκμήρασθαι καὶ τὰ ἀπολλύμενα.

Non solum igitur campi Marti et collis Capitolini, sed etiam Palatini, cui proxime situm est illud Flavium, plurima aedificia tum interierunt, neque igitur, quin suo iure saluum hic illud theatrum totum fere lapidibus exstructum Statius appellet, dubitari potest. — Deinde ut intellegatur, quam facile *calvum* e *salvum* fieri potuerit, in comparisonem afferre mihi liceat Baehrensi adnotationes ad Silv. II, 5, 6: *insertasque* ζ a: *incertasque* C; IV, 6, 57: *cedis* A, *sedis* C; IV, 8, 50: *astea* A C (pro *Actaea*). *)

Nunc autem haec relinquamus et alium locum perlustremus. Silv. IV. 6, 25, enim legimus:

Hic tibi quae docto multum vigilata Myroni
Aera, laboriferi vivant quae marmora caelo
Praxitelis, etc.

Monstravit.

id quod Gevartius mutavit in *monstrabit*. Nec tamen puto hic de alio quoquam dicere Statium, sed de se pso, cum antea diceret:

Mille ibi tunc species acrisque eborisque vetusti
Atque locuturas mentito corpore ceras
Edidici.

eamque ob causam hic quoque rectius fortasse legimus:

Hic mihi quae docto etc
Monstravit.

Alius locus difficillimus atque corruptissimus exstat Silv. V, 1, 19, qui in codicibus sic legitur:

Sed cum plaga recens et adhuc in vulnere primo

*) A = collatio libri Sangallensis a Politiano cum a instituta.

a = editio princeps.

C = libri Sangallensis apographum medio saec. XV factum, unde codices novicii fluxerunt.

ζ = doctorum Italorum coniecturae in codicibus noviciis.

Nigra domus questu miseramque accessus ad aurem
Coniugis orbat: tunc flere et scindere vestes
Et famulos lassare greges et vincere planctus
Fataque et iniustos rabidis pulsare querelis
Caelicolas solamen erat.

Ac primum quidem Heinsi coniecturam, qua scribitur
aegra pro *nigra*, omittere possumus, cum illam iam
Imhofius (*de Silv. Statian. cond. crit.* p. 13) recte
refutaverit. Difficiliora autem ea sunt, quae sequuntur
et, quamvis multi homines docti in his verbis sudaverint,
mea quidem sententia nondum emendata. Nam ne id
quidem, quod Baehrensius scripsit:

questu misero hautque accessus ad aurem
Coniugis orbat

probare possum. Summum enim eorum, quae hic
Statius dicit, hoc est, se primo post Priscillae mortem
tempore ad aurem Abascanti accedere non potuisse.
Excusat poeta, quod tam sero solatium suum ferat,
id quod compluribus locis eum facere notum est.
Propterea autem haec verba non possunt sententiae
subiunctae esse, sed primariae. Ceteris enim, quae
sequuntur, verbis: tunc flere et scindere vestes etc.
hoc, quod praecessit, demonstratur, quapropter ad illa
nam mente supplendum est. Itaque illud *que* post
miseram corruptum mihi videtur, id quod facillime
fieri potuisse concedet, qui hos locos comparaverit:
Silv. III, 1, 128:

dites Capreae viridesque resultant

Taurubulae,

ubi codices exhibent: *ditesque Capr(a)e*
et Silv. IV, 6, 19:

(*nox*) memoranda diu geniumque habitura perennem,
ubi in codicibus legitur:

geniumque habitumque perennem

Quam ob rem sic hunc locum sanandum esse puto:

Sed cum plaga recens et adhuc in vulnere primo

Nigra domus, quis tum miserandam accessus ad aurem
Coniugis orbat? tunc flere etc.

Similiter enim interrogat Statius Silv. I, 4, 115:

Quis mihi tot coetus inter populique patrumque
Sit curae votique locus?

Proximo autem versu:

Et famulos lassare greges et vincere planctus
ultimum verbum *planctus* mutandum est in *planctu*,
cum littera *s* e ceterorum, qui circumstant, ver-
suum ultimis vocibus *vestes*, *querelis*, *levandos* huc
videatur irrepisse. Sic enim Silv. V, 5, 12 Statius dicit:

Vincetur lacrimis,
non: Vincentur lacrimae.

Minor hac est ea, quae paucis versibus post in
eodem carmine exstat corruptela. Legimus enim v. 53:

tibi quamquam et origo niteret

Et felix species multumque optanda maritis,

Ex te maior honos, unum novisse cubile,
ubi sententia postulat, ut legatur:

tibi quamquam et origo nitebat.

Nam *niteret* nihil significare potest nisi modum irre-
alem, qui huic loco non quadrat, cum *quamquam*
Statius cum indicativo coniungere soleat, ut praef. I:
quamquam timeo, ne verum istuc versus quoque ipsi de se
proben et Silv. I, 4, 34:

quamquam tibi, Gallice, maius

Eloquium fandique opibus sublimis abundas.

Ac ne quis credat talem corruptelam apud Statium
inauditam esse, afferam Silv. III, 5, 32:

Tu cum Capitolia nostrae

Initiata lyrae, saevum ingratumque dolebas

Mecum victa Iovem,

ubi codices habent *doleres*.

Denique consensu aliquot locorum adducor, ut
Silv. V, 3, 109, ubi traditum est:

Si tu stirpe † vetas famaeque obscura iaceres,

non tantopere litteras respicere velim atque Baehren-
sius fecit, qui scripsit *vacans*. Legimus enim Silv.
I, 2, 172:

Nec formae nec stirpis egens
et Theb. I, 465:

Nec nos animi nec stirpis egentes
et Theb. VI, 896:

Tum generum, ne laudis egens, iubet ardua necti
Tempora.

Illa autem vox, quae est *vacans*, cum eiusmodi verbis
coniuncta non videtur inveniri. Quam ob rem hoc
quoque loco rectius fortasse legitur:

Si tu stirpis egens famaeque obscura iaceres.



Vita.

Gerhardus Adrianus natus sum Nonis Maiis a. h. s.
LXVIII Elbingae patre Gustavo, matre Ioanna e gente
Riediger, quorum utrumque praematura morte mihi
ereptum quam maxime lugeo. Parentes evangelici sua
fide me imbuerunt.

Primis litterarum elementis instructus, annum
undecimum agens in gymnasium Elbingense receptus
sum, cui per septem annos interfui. Deinde parentibus
mortuis cum unica sorore (et hanc quoque nonnullis
annis post subita morte amisi) Gedanum ad amicos
parentum me contuli, ubi a. LXXXVIII maturitatis
testimonium nactus sum. Tum studiis philologicis
primum Berolini per bis sex menses me dedi, unde
Herbipolim commigravi, ut praeter studia mea per
annum stipendia facerem. Per tria semestria ibi
moratus Gottingam adii, ubi per alia quinque semestria
studia mea continuavi et ad finem perdux. Docuerunt
me vv. cl. Berolini: Paulsen, Deussen, Ebbinghaus,
Diels, Hübner, Joh. Schmidt, Hirschfeld, Hoffory;
Herbipoli: Grasberger, v. Urlichs, Schanz, Volkelt,
Sittl, Lexer; Gottingae: Sauppe, de Wilamowitz, Leo,
Dilthey, Bechtel, Kielhorn, Volquardson, Dziatzko,
Heyne, Roethe, Baumann, quibus omnibus maximas
gratias habeo semperque habebo. Exercitationibus
seminarii philologici Herbipoli interfui nec minus per
tria semestria Gottingae. Per idem tempus Germanici
seminarii Gottingensis sodalis fui.

